

Poppekas Stories 1- Cornona Virus

Bedryf 1

Neelsie (kruip agter 'n bos weg)

Lolla kom verby gestap. Sy hoor iets in die bos. Sy stap nader en kry vir Neelsie.

Lolla: Liewe land Neelsie. Hoe laat jy my nou skrik! Wat soek jy in die bos?

Neelsie (Steek sy kop uit, fluister hard): Shh! Ek kruip weg.

Lolla: Waarvoor Neelsie?

Neelsie: Vir die Co-co-coro virus.

Lolla: Watse goed?

Neelsie: Die nuwe virus man. Dis oral.

Lolla: Die Corona virus. Hoe gaan 'n bos jou help teen die virus?

Neelsie: Ek kruip weg in die bos sodat die virus my nie kan kry nie. Dis oral en ek is baie bang ek kry dit. Maar as dit my nie kan kry nie, dan kan ek dit nie kry nie.

Lolla: Ek dink nie dis 'n goeie plan daai nie Neelsie. Jy kan mos nie vir altyd in 'n bos bly sit nie.

Neelsie: Nee, ek kan. Sien ek het kos en 'n flits en my foon. Ek het ook 'n klomp groen hempies sodat ek net soos die bos lyk.

Lolla: Ek dink nie dis die manier hoe mens veilig bly van die Corona virus nie. Eintlik is ek seker dit is nie.

Frikkie (Kom op.): Hi julle! Wat gaan hier aan? Neelsie wat soek jy in die bos?

Lolla: Neelsie, kruip weg vir die Corona virus.

Frikkie: Lolla, het jy aan hom verduidelik dat dit nie is hoe dinge werk nie?

Lolla: Ek is besig, maar ek dink nie Neelsie verstaan baie mooi nie.

Neelsie: Nee, Lolla. Dis jy wat nie verstaan nie. Hierdie plan is perfek.

Frikkie: Neelsie, kom net asseblief uit die bos. Ek dink ek sien 'n by.

Neelsie (Gil en kom uitgespring)

Lolla: Neelsie, kom saam met my en Frikkie hystoe en dan sal ek jou mooi verduidelik hoe jy veilig kan bly.

Neelsie: Ok Lolla. Ek wil in elk geval nie 'n bos deel met bye nie.

Lolla, Frikkie en Neelsie gaan af.

Bedryf 2

Neelsie, Lolla en Frikkie kom op. Hulle is nou by Lolla se huis.

Lolla: Sjoë Neelsie. Ek is bly jy is uit daardie bos uit. Ek het nie geweet jy is so bang vir die Corona virus nie.

Neelsie: Ja, Lolla. Ek hoor hy maak mense vreeslik siek en ek wil nie siek raak nie.

Frikkie: Ek het dit ook gehoor. Ek hoor mense gaan hospitaal toe.

Lolla: Dis reg ja. Dit is nie speletjies nie.

(Lolla kyk na die gehoor)

Lolla: Maatjies, het julle dit ook oor die virus gehoor? Wie is ook bang dat hulle die virus gaan kry of dat iemand vir wie julle lief is die virus gaan kry en baie siek raak?

Neelsie: Sien, ek is nie die enigste een wat bang is nie Lolla. Oooo hoekom sit ek nou hier in plaas van in my bos?

Frikkie: Neelsie, die bos gaan jou nie help nie. Daar is ander dinge wat jy kan doen om nie siek te raak nie.

Neelsie: Nou wat kan ek dan doen Frikkie?

Lolla: Jy moet 'n masker dra.

Neelsie: Soos my Iron Man masker? Gaan dit die virus laat skrik?

Lolla: Nee man Neelsie. 'n Masker wat jou mond en neus toemaak dat jy nie die virus inasem nie. Soos hierdie een. (Lolla wys 'n masker)

Frikkie: Jy moet ook gereeld jou handjies was. Die slim mense sê as jy twee maal Happy Birthday gesing het, dan is dit lank genoeg. En wanneer jy nie by water en seep is nie, dan saniteer jy met daardie botteltjies saniteerder. Dit beskerm jou ook teen die virus.

Lolla: Jy moet ook sosiale afstand hou.

Neelsie: Wat is so-si-ale afstand Lolla?

Lolla: Dit beteken jy moet ver sit of staan van ander mense af. Omtrent so meter uitmekaar.

Frikkie: En as jy hoes of nies, doen jy dit so in jou elmboog. En moenie aan jou gesig vat as jou hande nie skoon is nie.

Neelsie: Ek gaan nie al hierdie dinge onthou nie. Ek soek my bos.

Lolla: Dis nie so moeilik nie Neelsie. Ek is seker die maatjies gaan als onthou. Maatjies, kan julle vir ons vertel hoe bly mens veilig teen die virus?

Frikkie: Wow maatjies, julle is baie slim en het so mooi geluister.

Neelsie: Lolla, Frikkie, as die maatjies so mooi kan onthou, dink ek dat ek ook kan. Ek het nie my bos nodig nie. Ek was net 'n bietjie bang, maar nou voel ek beter.

Lolla: Die Corona virus maak baie mense bang, Neelsie. En dit voel na baie reëls. Maar kom ons kyk hoe ons sommer 'n goeie les kan maak van al die reëls. Gaan julle my help Frikkie en Neelsie?

Frikkie en Neelsie: Ja, Lolla.

Lolla: Kom ons drink eers bietjie koeldrank en dan werk ons aan daardie les vir die maatjies.

Lolla, Frikkie en Neelsie gaan af.

Bedryf 3

Lolla, Frikkie en Neelsie kom op.

Lolla: Maatjies, ons het nou bietjie gewerk aan ietsie sodat ons nie so bang voel nie, maar eintlik 'n bietjie hoop vir ander mense kan bring. Wil julle hoor?

Frikkie: Ek het hande was gekry Lolla. Ek het gedink dat ons ook ons hande kan gebruik om ander mense te help. Maatjies, hoe kan ek ander mense help met my hande? (Mamma help by die huis, Juffrou help dra aan al die boeke, broodjie gee vir 'n maatjie wat nie het nie, ens.)

Lolla: Dis nou oulik Frikkie en maatjies. Neelsie, wat het jy aan gewerk?

Neelsie: Die sosiale afstand. Ek dink ons moet wegbly van verkeerde dinge. Soos skinder en dinge op Youtube wat nie baie mooi is nie. Kan julle aan nog goed dink maatjies?

Frikkie: Met hande saniteer het ek gedink dat ons ook ons lewens moet skoon hou van al die lelike en slegte goed. Sê jammer as jy 'n maatjie of dalk vir mamma seergemaak het en moenie so gou kwaad word nie.

Lolla: En dan is daar masker dra. Die masker gaan mos so oor ons mond en neus. Nou het ek gedink dat ons nie moet vloek nie, en te dink voor ons van ander mense praat. En nie neus in die lug rond te loop nie – dit beteken ons dink nie ons is beter as ander nie.

Neelsie: Lolla, ek het sommer nou baie geleer. En die dinge is darem makliker as om heeldag in 'n bos weg te kruip. Die blare laat my vreeslik jeuk.

Lolla: Ek is so bly ons kon help Neelsie. Maatjies, ons hoop dat ons julle ook vandag kon help om minder bang te voel vir die virus. Dis nou tyd vir ons om te gaan. Julle moet veilig bly.

Frikkie en Neelsie: Totsiens maatjies.

(Al die poppe beweeg af)